

agus a mhic, agus éididh a mhac maille ris.

31 Agus thubhairt Maois re h-Aaron, agus r'a mhic, Bruichibh an fheoil aig dorus pàilliuin a' choi'-thionail: agus ann an sin ithibh i leis an aran a ta ann am batcaid a' choifreagaidh^a, mar a dh'aithn mise, ag ràdh, Ithidh Aaron agus a mhic i.

32 Agus an ni sin a dh'fhàgar do'n fheoil agus do'n aran, loisgidh sibh le teine.

33 Agus air dorus pàilliuin a' choi'-thionail cha d'théid sibh amach rè sheachd laithean, gus am bi laithean bhur coifreagaidh air an crìochnachadh^b: oir rè sheachd laithean coisrigidh e sibh.

34 Mar a rinn e 'n diugh, mar sin dh'aithn an Tighearna bhi deanta, dheanamh réite air bhur sòn.

35 Uime sin aig dorus pàilliuin a' choi'-thionail fanaidh sibh a là agus a dh'oidhche, rè sheachd laithean, agus coimhididh^c sibh freasdal^d an Tighearna, chum nach faigh sibh bas: oir is ann mar sin a thugadh aithne dhomhsa.

36 Agus rinn Aaron agus a mhic na h-uile nithe dh'aithn an Tighearna le làimh Mhaois.

C A I B. IX.

AGUS air an ochdamh là ghairm Maois air Aaron agus air a mhic, agus air seanairean Israeil;

2 Agus thubhairt e re h-Aaron, Gabh dhuit féin laogh òg chum iobairt - pheacaidh, agus reithe chum iobairt-loisgte, gun

ghaoid, agus thoir feachlad^e iad 'an làthair an Tighearna,

3 Agus labhraidh tu re cloinn Israeil, ag ràdh, Gabhaibhsa meann do na gabhraibh chum iobairt-pheacaidh; agus laogh, agus uan, *le chéile* do'n cheud bhliadhna^e, gun ghaoid, a chum iobairt-loisgte;

4 Mar an ceudna tarbh agus reithe, mar thabhartasan-sith, a chum an iobradh 'an làthair an Tighearna; agus tabhartas-bìdh measgta le h-oladh: oir an diugh foillichidh an Tighearn e féin dhuibh.

5 Agus thug iad an ni sin a dh'aithn Maois gu beulaobh pàilliuin a' choi'-thionail: agus thàinig an coi'-thional uile 'm fagus, agus sheas iad 'an làthair an Tighearna.

6 Agus thubhairt Maois, *I, e* so an ni a dh'aithn an Tighearna gu'n deanadh sibh: agus foillichear glòir an Tighearna dhuibh.

7 Agus thubhairt Maois re h-Aaron, Imich a dh'ionnfuidh na h-altarach, agus iobairt iobairt-pheacaidh, agus t'iobairt-loisgte, agus dean réite air do thonféin agus air sòn an t-sluaigh: agus thoir suas tabhartas an t-sluaigh, agus dean réite air an sòn, mar a dh'aithn an Tighearna.

8 Chaidh Aaron uime sin a dh'ionnfuidh na h-altarach, agus mharbh e laogh na h-iobairt-pheacaidh, a bha air a shion féin.

9 Agus thug mic Aaroin an fhuil d'a ionnfuidh: agus thum^f e mheur^g san fhuil, agus chuir e

^a nan nithe coisrigte. ^b gus an là anns an crìochnaich laithean bhur coisfreaidh. Eabh. ^c gleidhidh. ^d cùram, ordugh. ^e bliadhna dh'aois. ^f thom, bhog.